



LAPORAN Banci Nelayan disampaikan oleh Felix kepada Samsuddin (tiga kiri) sambil diperhatikan Abdul Mijul (dua kiri), Ismail dan Masood (kanan).

95 peratus keluarga nelayan terkeluar dari garis kemiskinan

Oleh HENRY BATING


hbating@gmail.com
 4B 04-05-2012 B13

KOTA KINABALU: Banci Nelayan Sabah 2012 mendapati 95 peratus daripada isi rumah keluarga nelayan di negeri ini memiliki perolehan bulanan di atas paras kemiskinan sebagai hasil daripada program peningkatan taraf hidup pelbagai agensi kerajaan persekutuan dan negeri.

Pengurus Besar Korporasi Kemajuan Perikanan dan Nelayan Sabah (Ko-Nelayan), Haji Masood Haji Salleh berkata dapatan banciaan itu menunjukkan program-program yang telah dilaksanakan oleh Ko-Nelayan dan agensi-agensi lain persekutuan dan negeri telah berjaya membantu menaiktaraf hidup masyarakat nelayan di Sabah.

“Laporan banci itu juga menunjukkan bilangan nelayan artisanal (tradisional) berstatus warganegara Malaysia pada tahun 2011 adalah seramai 14,260 orang berbanding Perangkaan Tahunan Jabatan Perikanan Sabah (JPS) 2007 yang menganggarkan terdapat kira-kira 20,845 orang nelayan sepenuh masa di negeri ini,” katanya.

Masood berkata, dapatan



MASOOD menyampaikan penghargaan kepada Ismail disaksikan Felix, Samsuddin dan Abdul Mijul.

itu terkandung dalam Laporan Banci Nelayan Artisanal yang dijalankan oleh Ko-Nelayan dengan kerjasama Universiti Malaysia Sabah (UMS) diketuai Prof. Madya Dr. Ismail Ali selama kira-kira tiga tahun bermula November 2008 hingga Mac 2012.

Menurutnya, banci yang komprehensif sangat diperlukan untuk dijadikan sebagai rujukan dan panduan oleh pihak kerajaan dalam membuat perancangan mengenai program-program peningkatan taraf hidup golongan nelayan di negeri ini.

“Banci Nelayan ini juga telah memberikan beberapa cadangan mengenai langkah meningkatkan kualiti hidup nelayan dari segi pendidikan anak-anak, kesihatan, kebersihan, alam sekitar, perumahan dan perubahan minda

nelayan,” katanya.

Laporan Banci Nelayan itu telah diserahkan secara rasmi oleh Pengarah Pusat Pengurusan Penyelidikan & Inovasi, UMS, Prof. Dr. Felix Tongkul mewakili Naib Canselor UMS kepada Pengerusi Ko-Nelayan, Datuk Samsuddin Yahya di Wisma Pertanian di sini kelmarin.

Menyaksikan penyerahan rasmi itu ialah Timbalan Pengerusi Ko-Nelayan, Datuk Abd Mijul Unaini, ahli-ahli Lembaga Pengarah dan Timbalan Dekan Pusat Penataran Ilmu dan Bahasa (PPIB), UMS, Dr Anantharaman Govindasamy.

Atas kejayaan program banciaan itu, Masood berharap pihaknya dapat melaksanakan banciaan yang serupa dengan memberi fokus terhadap kajian penglibatan wanita dalam pembangunan industri hiliran perikanan.